


0 10 20 30 40 50 60 70 80 90 100 110 120 130 140 150 160





Kodak Color Control Patches

centimetres
1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28

15676-290

227



堵文忠公平書
册 / 書号 53846



謝文忠公年譜

精日陳巖政

龍文忠公年譜

精日陣藏

龍文忠公年譜

道光癸卯鐫

堵文忠公年譜

靜日軒藏版

年譜自唐宋來多有如太白少陵昌黎者而宋歐陽文忠公
行年譜然皆後人以誤大抵以本傳爲主而取附文忠公
考定其先後及軼事之見他書者年經月緯之其前不無
附會外論識者病之甚矣論世之難也陽羨潘卓齋明經
家余嘗出示堵文忠公年史係公所自著惟厥前數年
後人補錄一無附會外記之弊所請信以傳信者非耶
陽羨卓君明季方意與辨書最善者推盧培二公盧
培公之於文忠公亦知之殆公致命於備闕問遺之

堵文忠公年譜

靜日軒藏版

序

年譜自唐宋來多有如太白少陵昌黎香山東坡紫陽俱
 有年譜然皆後人所撰大抵以本傳為主而取詩文雜著
 考定其先後及軼事之見他書者年經月緯之其間不無
 附會舛訛識者病之甚矣論世之難也陽羨潘卓齋明經
 來余官舍出示堵文忠公年史係公所自著惟歿前數年
 為後人補錄一無附會舛訛之弊所謂信以傳信者非耶
 陽羨地靈人傑明季尤忠貞駢奮最著者推盧堵二公盧
 忠肅公之致命遂志人競知之堵公效命於偏隅閩運之

朝崎嶇楚粵間卒之馳驅盡瘁死而後已公既亾而國隨以墟其忠風亮節視盧公何多讓焉盧公文集內亦有年譜係其孫子所纂輯今此編出堵公手錄彌可寶貴也卓齋讀書好古以文學世其家頃爲余言堵公宜邑未有專祠有志購屋奉祀并梓年譜行世而索余一言其慕義若渴洵可嘉尙余故不辭禱昧綴數語於簡端俾歸而付之梓竊冀附公以不朽云爾

道光十三年歲次癸巳清和月平羅俞德淵書於維揚齋署之景賢樓

明史列傳

堵允錫字仲緘無錫人崇禎十年進士歷官長沙知府山賊掠安化寧鄉官兵數敗允錫督鄉兵破滅之又殺醴陵賊魁遂以知兵名十六年八月賊陷長沙允錫朝覲還賊已退明年六月福王命爲湖廣參政分守武昌黃州漢陽左良玉稱兵總督何騰蛟奔長沙令攝湖北巡撫事駐常德唐王立拜右副都御史實授巡撫李自成死衆擁其兄子錦爲主奉自成妻高氏及高氏弟一功驟至澧州擁衆三十萬言乞降遠近大震允錫議撫之騰蛟亦馳檄至乃

躬入其營開誠慰諭稱詔賜高氏命服錦一功蟒玉金銀器犒其軍皆踴躍拜謝乃卽軍中宴之導以忠孝大義數千言明日高氏出拜謂錦曰堵公天人也汝不可負別部田見秀劉汝魁等亦來歸唐王大喜加允錫兵部右侍郎兼右僉都御史總制其軍手書獎勞授錦御營前部左軍一功右軍並掛龍虎將軍印封列侯賜錦名赤心一功名必正他部賞賚有差號其營曰忠貞封高氏貞義夫人賜珠冠綵幣命有司建坊題曰淑贊中興允錫遂與赤心等深相結倚以自強然赤心書疏猶稱自成先帝稱高氏太后云已而袁宗第劉體仁諸營先歸騰蛟者亦引與赤心合衆益盛允錫以芻糧難繼令散處江北就食明年正月騰蛟大舉期諸軍盡會岳州獨赤心先至餘逗遛卒不進永明王立進允錫兵部尙書總制如故

順治四年永明王令赤心等攻荊州月餘

大清兵援荊州赤心等大敗步走入蜀數日不得食乃散入施州衛聲言就食湖南時王在武岡劉承允懼爲赤心所并計非允錫不能禦乃加允錫東閣大學士封光化伯賜劍便宜從事允錫疏請得給空敕鑄印頒賜秦中舉兵

傳
者時頗議其專承允欲殺騰蛟允錫劾其罪八月

大兵破武岡及寶慶常德辰沅允錫走永順土司尋赴貴陽抵遵義乞師於皮熊王祥又入施州請忠貞營軍會楚宗人朱容藩僞稱監國天下兵馬副元帥擅居夔州御史錢邦芑傳檄討之五年正月允錫見容藩責以大義曉譬利害散其黨未幾金聲桓李成棟叛我

大清以江西廣東附永明王於是馬進忠王進才曹志建李赤心高必正等乘間取常德桃源澧州臨武藍山道州靖州荆門宜城諸州縣進忠赤心必正皆封公允錫與進

忠有隙令赤心必正爭進忠所取常德進忠盡焚廬舍而去赤心等棄空城引而東所至守將皆燒營棄城走湖南已復州縣爲一空允錫乃率赤心等入湘潭與騰蛟會騰蛟令允錫向江西而自率進忠等向長沙六年正月兵方逼長沙騰蛟在湘潭被執諸軍遂散赤心等走廣西緣道掠衡永郴桂允錫與胡一青守衡州戰敗走桂陽初赤心等入廣西龍虎關守將曹志建惡其淫掠竝惡允錫允錫不知也或說志建允錫將召忠貞營圖志建志建夜發兵圍允錫殺從卒千餘允錫及子逃入富川猺峒志建索之

傳
急搖潛送允錫於監軍僉事何圖復開關達梧州會王遣
大臣嚴起恒劉湘客安輯忠貞營至梧而赤心等已走賓
橫二州乃載允錫謁王於肇慶志建遷怒圖復誘殺之闔
門俱盡允錫至肇慶時馬吉翔及李元允袁彭年等皆專
柄各樹黨允錫乃結歡於吉翔檄赤心等東來與元允爲
難移書瞿式耜欲問元允託言王有密敕令已與式耜圖
元允王頗不悅元允黨丁時魁金堡又論其喪師失地乃
令總統兵馬移駐梧州允錫以赤心等不足恃欲遙結孫
可望爲強援矯王命封爲平遼王允錫尋至潯州自恨發
病十一月卒王贈允錫潯國公謚文忠

堵文忠公年譜



公姓堵氏諱允錫字仲緘一字牧子號牧遊其先淮陰人元至正二年通五公始徙居宜興之前亭里高祖味間公諱霽配蹇氏曾祖覺菴公諱楨配吳氏祖月川公諱佳配王氏父冲字公諱維嘗配胡氏繼陶氏公陶母出也遡通五公十世矣崇禎癸酉舉於鄉丁丑成進士永明時官至少傅太子太師吏部尚書兼兵部尚書文淵閣大學士卒贈上柱國中極殿大學士太傅兼太子太師鎮國公諡文襄改諡忠肅

明史作潯國公諡文忠

辛丑萬曆二十九年十二月公生于武進夾山之麓 先
世以貲雄于邑公祖月川公兄弟爭財鬩牆不已月
川公欲以身率乃盡讓田產於兄弟徙居夾山王氏
之別業名十房街

自記大人年幾四十再娶而艱于嗣禱于三茅山神甚
虔一夕夢神語曰吾畀而一子自擇之吏導至廡下啟
一室冠進賢襴袍束帶列坐十餘人又啟一室儒衣巾
列坐者十餘人吏請所欲皆不願旁小室局鑄甚嚴窺
之惟欄中一牛牧牛兒臥其旁躍然曰吾欲得牧牛兒
爲子吏白之神神曰此非爾子也他惟所欲因叩頭固
請神曰必欲得牧牛兒而夫婦當減算復叩首曰誠得
牧牛兒爲子願減算也神乃許之既覺具以語慈慈亦
喜未幾果有脈辛丑十二月初八生名授志神授也

壬寅萬曆三十年二歲居夾山

自記慈以艱產致疾十日五在牀大人擁錫於膝間口
誦手摩無間晷刻 時錫乏乳乃遊乳里巷間婦之暫
而潔者迎之則笑投於懷啖其乳立盡否則設誘多方
弗受也大人奔走怠憊偶一得乳喜動顏色 錫之遊

固天授哉少遊閭里長遊四方顧遊而惟王孫之哀是
倖猶得以苟果其腹乃皙黑污潔之去取其不餒以沒
世也幾希矣

癸卯萬曆三十一年三歲居夾山

自記錫生而苦啼慈擲之地仰牽其裾彷彿識慈之面
貌服飾及庭間卉木風日之景心竊計曰奈何不撫摩
予而使困抑乃爾乎啼益急如一虵嗥嗥不能自己嗚
呼兒時風景不及復憶者多矣惟爾日情形若了了若
不了了耿耿心目間果夙憶耶抑先慈不忍棄錫而陟
降其靈耶每一念及刺焉在心

甲辰萬曆三十二年四歲居夾山

自記暑月大人袒臥於筦錫置所啖米於大人喉坎間
為倉以兩肩之坎為別儲與同儕約先啖東西儲而後
及倉戒勿轉側少狼籍須大人自拾樂矣哉種種穉驕
所謂孩提之愛也迄今追溯洵有餘甘

乙巳萬曆三十三年五歲居夾山

自記大人與慈同舫錫侍幘高多礙慈謔曰可脫之於
河錫僞不解伺隙遽擲之慈愀然曰其悍足以殺人大

人笑曰無憂其狡足以自脫

丙午萬曆三十四年六歲居夾山十月夫人陶氏卒

丁未萬曆三十五年七歲居夾山隨冲宇公館於南宅之

黃氏三月納采於陳氏陳氏與之官瀆

岳翁字娛瀆名大懋故冲宇公門下士也岳母許氏

戊申萬曆三十六年八歲居夾山隨冲宇公館於下坊之

劉氏七月治毛詩十一月痘

己酉萬曆三十七年九歲居夾山隨冲宇公館於下坊之

劉氏九月試筆作文題若夫豪傑之士二句公援

筆成篇有豪傑者使人待我豈我待人之句座客驚

賞

庚戌萬曆三十八年十歲居夾山隨冲宇公館於下坊之

劉氏

自記大人以去歲鄉闈不振每中夜撫牀而泣錫請曰

夫子何不豫之深也日而大父母教育予者數十年予

亦銳志攻苦今且就衰矣白髮在堂為喜有限而兩母

復中道析予潦倒至此何以慰存歿後先之志乎心驚

鐘漏百愴具來是以悲耳錫亦泣然淚數行下大人

嘗曰孔子一生只任爲誨二字以臆測之爲誨應非有
兩義力學所以爲教也已之不正何以正人推誠與人
所以誠身又曰行誼實也學問華也未有實積而華不
茂者錫拜受教一日出大父手書有曰比爾就塾爲
他人師使我心惻師人匪易況爲人師乎而能以師古
者使人之足以師而庶無愧也大人問錫曰而讀之亦
能有所感發否錫曰學不師古何以教人師古正自難
宜大父言之凜凜也大人曰然抑而知大父之教我者
卽所以教而乎師人匪易者而今日事也爲人師不易
者我今日事也思及匪易何刻可寬父子佩以終身有
餘矣雖閒燕當如庭對也

辛亥萬曆三十九年十一歲居夾山隨冲宇公館於三橋

之周氏

自記大人聲價達於江都宦族以厚幣來聘大人力辭
時杜府尊承式與大人稱文行之友曰得館穀以爲甘
旨費不亦孝乎大人曰菽水者士子之恒古人不以是
貶孝晨昏依戀爲歡實多終不欲以彼易此也太守乃
遣以金大人復辭太守曰周之則受不足傷廉大人曰

不曰免死而已乎某句讀治生猶足以自給不至有凍餒之憂而受夫子金是某有市心也古人一介不苟況纍纍乎太守動容良久曰不其難哉不以貧沮不以利易篤志勿懈貞行無間我思古人此之謂矣是歲受里中周氏聘修脯僅成而已

二月月川公授讀左史

予自記大父嘗曰士子以經世爲務猶五采之堅瓠也投兒頗慧其課以左國書使知古今成敗得失之由見聞廣則胸臆開是亦學者明心致身之要也至是日讀數冊大人爲之口解指畫疊疊忘倦錫幼而好嬉嘗累棋盡三十二子而不墜誇示於人大人曰更爲之復累三十一子有喜色大人曰墜矣墜矣加一子果墜錫曰何以知之大人曰始而之累子也不知其能盡累也氣斂貌肅惕惕乎有憂心故能及也此一簣之所以爲山也旣而更爲之也已自恃其能又欲誇所能於人驕吝之心積於中而技巧之色張於外能逮乎三十一子俸矣而復有滿志焉以爲此一子之立成也以爲此一子之立成者意中已無難乎一子也始也子子而難之故

累三十二子而有終既也子子而易之故累一子而弗
克此一簣之所以終虧也且方子之墜也何以處下者
不墜而最上者先墜又何以三十一子之盡墜而一子
終不墜夫此最上之一子者巧之至也功之成也名之
歸也然患且立至卽倖而已成亦岌岌乎不可以崇朝
不如最下者有磐石之安也甚矣處下易而處上難也
故上有下心者享成下有上心者殺身是以君子不呈
巧不居功不炫名旣而曰而知家世之何以興何以敗
乎吾家始以淮上布衣負耒至前亭里且讀且耕遂以
茨梁起家而高曾俱手闢數千百頃使子孫不鄙薄前
功至今家聲勿替可也顧以詩書爲具文耒耜爲俗物
而麈尾唾壺是尊百年之業一朝而殞由是觀之守祖
業者漸以昌棄祖業者忽以殃數筭一犁予家之赤刀
天球也又曰口之不戒而有腹患舌之不謀而有心患
錫時雖幼然謹誌之不敢忘

三月冲字公卒 先禁烟節冲字公治裝歸省晨謂
公曰勝後纍纍者如有所患未幾成疽越數日疽潰
計後事因從容與公論讀書何爲且問忠孝何以盡

其道公以揚名顯親委身致主對沖宇公曰噫此猶
夫世俗之見也疏水之養無孝乎氓隸之賤無忠乎
蓋無念弗愛孝也極之臨深履薄以成無行弗謹忠
也根諸質影盟衾而達是以事業文章或有時待惟
忠孝兩者無待但能當下猛省終身不悔斯卽所以
爲顯揚委致者耳吾無長物貽汝惟此永訣數語也
又曰學者之患莫大於成敗易中夫敗有沮色者必
其成有溢志豈讀書人本來面目爾其誌之又曰立
身行己之道莫切於禮吾久欲授爾未逮其卽讀之
因命舉笥出經公拜受展誦樂正子春下堂傷足一
章諄諄反覆未竟沖宇公忽嘔血而暈旣一刻而復
甯喟然曰吾父母恩勤教育予者五十年予竟溘然先
逝矣天乎必不許某終養乎蓼莪之恨費於重泉斷
籟淒風當時聞某涕泣聲已強起再拜痛咎之言不
絕於口至初五日午時遂正衾斂手而卒
白記大人博學強記於書無所不讀尤謙抑訥訥不出
諸口處已嚴而切與人醇而有恩至睦友仁衆恤寡賑
貧皇皇如不足然不敢專意必受命於王父母而後以

許人孝友蓋天植云

七月月川公卒

自記大父之於書天而嗜者也飯蔬沒齒不以易心每開卷靜對無論寒暑間與人談則翛然一往別有元致尤喜左國綱目諸書行坐不釋或誚之曰叟奚爲是汲汲者大父哂曰予不快與今人爲伍聊促膝古人以自怡悅耳 大人竭力甘旨終身無私蓄所遺片祿十畝而已旋遭大父之喪而大母王夫人繼逝營貨殆遍拮据以償先業遂蕩然矣

壬子萬曆四十年十二歲依於岳家陳氏

自記大人以兩配早世矢不復娶以供旨故置一妾治兩喪與有力焉至是不相安而嫁予傍徨無依將與俱往岳父娛濱陳公聞之太息曰吾師乎僅此孤也乃載予以歸 岳父貧而好義延師誨予毅然以父兄之責自任予嚴憚之岳母許氏其所以卵翼予者最詳而切雖失怙恃不致無依陳氏力也

癸丑萬曆四十一年十三歲依於陳氏 正月附于周氏之塾 四月改附于李氏之塾 十二月歸于陳氏

自記時隆冬無緇露肘向日披讀左國書不覺移午掩卷起忽手足攣曲不可復伸仆地而呼許母抱置敗絮中踰刻而復

甲寅萬曆四十二年十四歲依於陳氏 正月附於蔣氏

之塾

四月王母王氏卒合葬於虞山祖塋之昭

自記王母毘陵太學心厓公女固膏梁族及來歸妯娌間競以奢侈相尙王母每有盈昃之憂獨恭儉勤慎諸子甫釋襁褓卽口授以句讀其爲教於兩姑內則爲先

紡績次之戒女紅勿爲奇巧故兩姑之字皆有賢風時家業替甚而王母始之弗盈者終亦弗歛誠女德之純至者矣予家內徽世嗣則王母與二母相後先天不降鑒悲夫

之塾

乙卯萬曆四十三年十五歲依於陳氏附溧陽戈旗周氏

教之

丁巳萬曆四十五年十七歲依於陳氏附舅氏之塾

自記時妻家貧甚不能設塾予裹糧往依伯舅不見恤也聊數月而被遣 大人易簣時嘗囑舅氏善視錫一且稍拂其意遂相矛伐鼓予嗣後不敢復望舅氏顏色迄今伯舅物故家落母妗之老予贍之外兄之貧予禮之外弟之孤予賑之復爲娶婦渭陽之誼予何忍薄蓋念先慈一體相及謂宜世世如初也願我兩姓怨則速忘德弗敢市也

戊午萬曆四十六年十八歲附於戴圻黃氏之塾

十二月遺書被災

自記子身之外惟餘先世遺書一篋皆大人平日丹鉛甲乙所諄諄誨示者予行止相隨每自恃以爲碩果偶頓於郡中薛氏火發被災嗚呼何天之喪我如不我克至不憖遺一物以慰我世守之思耶桑梓非故手澤亦復化爲劫灰鮮民之生可勝浩嘆

己未萬曆四十七年十九歲依於陳氏設塾訓蒙

自記凶饑滯至飢寒剝膚末之乃受四蒙童以糊口卒歲所獲四金而已夏則懸被爲帳入而汗蒸出則蚊嚙體竟夕不寐冬則破襦爲袴代絮以麻纍纍若綬之欲

脫露肘決踵踏歌風雪中或遇良月靜夜則欹坐古橋
湖畔背誦經文徘徊達曙日以爲常聞者嗤笑其目爲
癡公少落魄嗜酒好大言逆知天下將亂慷慨思奮
功名顧俯首挾冊爲童子師非其好也大書壁曰素
貧賤行乎貧賤受牛羊則牧牛羊嘗購頭顱盃容一
升許出入攜持爲飲器兼得一古玉印篆三不要癡
男子字謂不要錢不要官不要命也後悉酬其言人
初目公爲狂實不狂也嘗讀書奈澤寺醉出墮泥
塹罵曰伽藍神司何事不爲我除道提神像擲塹中
夜夢神逐之急將獲俄聞空中人言若不可逐神乃
止少依舅氏舅惡其縱酒不自檢每鍵之一室命
之讀書及啟已踰短垣出坐鄰肆中指揮叱咤持頭顱
盃浮滿一吸盡擲杯呼座客曰若來看我杯不大似
若輩頭顱耶座客驚散舅益惡之然覈所讀書不肯
遺一字亦以是奇之公軼事數則年月無攷姑係
於此

庚申萬曆四十八年三十歲依於舅氏七月遊無錫依

自於族兄知白家

自記歲饑米價湧貴家人嗷嗷予卜遊得吉擬抵蘇浙
間傭書爲活計苦無衣糧乃於里間以拆字相人禍福
忽奇中旬日得錢二千以半貿衣存半爲費過毘陵遇
臧子瑞微甚歡縱飲而盡乘醉步至五牧鎮遇雨日且
暮探袖中餘兩錢耳有徐又思者館於其地予入告徐
意動爲畱信宿予忽病主人患之資少費遣予至無錫
之崇安寺至寺病不可起削肌脫髮無復生狀爲僧徒
所逐傍徨寺中忽遇族兄知白一見傾許慰勉詳曲拉
予以歸越數月病乃復是役也窮途病劇跋涉風雨困
苦之狀求爲傭乞人不可得微四兄知白傾蓋於患難
之頃物色於飢瘠之餘其不以先人之身行殆者幾希
矣嗟夫固窮未能動足有悔可不戒歟

泰昌元年

貞廟卽位未久賓天臣民不忍沒之以八月後爲泰昌元年一歲兩元以義起也

十月就無錫縣試錄 十一月府試錄 十二月院

試黜

辛酉天啟元年二十一歲依於族兄知白家 二月執贄
於馬素修之門

自記馬師見予院試落卷賞之因執弟子之禮三年多

所資益 素修名世奇字君常無錫人崇禎辛未進士
官至春坊左諭德嘗曰遇事宜存生機勿存殺機處
世宜尋退步勿爭進步人以爲名言甲申之變沐浴
更衣捧敕印北向拜復南向拜母同妾朱氏李氏闔
室自經死後諡文忠

三月就婚於陳氏

自記時予旣生計依人妻父復喪殮不繼合卺之夕謀
一新布衣不可得乃煮楮塗做縑以充孔嘉之色婦亦
泰然自居無少歎阻意頗得梁孟遺風

七月冠 公憤讀書未有成服齊民之服以自愧

獻策於郡侯不納 遼事孔亟詔募材俊之士以備
邊公作書盈萬言上之太守何公應瑞何公奇之謂
曰汝奚能對曰無所不能曰能弓馬乎對曰不能曰
能擊刺乎對曰不能曰能風雲占乎對曰不能何公
笑曰然則奚謂無所不能對曰某將十萬兵與敵角
能使弓馬者盡其技擊刺者盡其力工風雲占者盡
其術變化生心決勝於俄頃不能人之所能而能人
之所不能何公喜曰汝固奇士然當以詩書自輔益

奚屑與蹶張者齊驅竝進乃受策而不許入募

壬戌天啟二年二十二歲依於陳氏五月補府學弟子

員

自記府試既黜計無所之乃徒步至江上糾同志譁於
學使之門爲闌所踣予怒毆闌者而呼同志皆呼學使
心動命何府尊於正考之外特加收考約非七藝不錄
試於江陰之學宮與試者三千人錄三十六人予幸得
標院試進八人予幸居次皆送入府學是役也徒步三
百里忘寢食者十五晝夜譁於院門者六闌人之椎中
背發腫偃曲月許至不能咽噎憊矣一衿困人至此極
哉十二月徙居無錫族兄知白之別業名中橋莊

癸亥天啟三年二十三歲居中橋莊四月府科試不錄

府試既黜或勸公曰急請於府尊可以復續公曰所
貴於士者以其氣節也炫玉求沽君子所恥且得失
者時也窮達者命也卽請而得錄後遇正自難期奈
何喪其固有者以徇其不必有乎堅窮善藏此其時
也五月致蔣定於獄不克訟

自記初三仲父有女嫁里人蔣定無賴喪家挈妻逃於

江北旋棄之歸適遇於道憤甚訟於府繫諸獄越月定
脫獄而逃捕之不獲後同伯兄越江遍訪無可蹤跡或
云彼中懼匿之或云已故噫至戚飄零不知存歿念之
嗚咽

甲子天啟四年二十四歲居中橋莊正月就塾於無錫
五月長女生六月復徙歸於陳氏

自記知白兄重予學行悉力推解忌者讒侮交作予不
能安告歸荆溪兄不得已許之予與妻女共坐一舟行
不十里忽大風拔木雨如泉注望岸咫尺搖搖不得依
泊舟幾覆者再三暑月至僵凍失色人事天行交相爲
虐亦有生一大奇阨也

乙丑天啟五年二十五歲館于南圻之蔣氏
自記主人力耕樸樾稱長者予時方跌宕自喜多不相
合後亦釋然如初則其弟任予之力也一時同志有魯
桐聲蔣沖之史吾往來北翔十月歲試降青
丙寅天啟六年二十六歲依於陳氏二月長女殤

自記自四年大水五年大旱斗米二百錢內子針紡佐
食凍瘡裂甚十指如懸槌日得一炊便相慶幸予入室

值丙子私涕慮予之覺之也強爲笑容予心怪之然亦弗敢詰也 四月季試得標十月院科試一等復附

丙寅十一月子孫驥生

丁卯天啟七年二十七歲就叔祖心瞻之聘 心瞻名應

合畿以序貢仕至山東觀城縣

自記心瞻叔祖之任山東約予偕往予從之以二月入署六月歸始知新學使覆科比兼程已不及矣 七月

院覆試不與除科舉 公以之任不及赴覆訴之學

使訑訑不受公慙激不能爲屈媚之語遂拂衣出親

知九之公笑曰丈夫屈伸固自難期如終屈也屈我

者寧一學使乎如不終屈予亦何求乎學使

戊辰崇禎元年二十八歲就仲舅漏西之塾

己巳崇禎二年二十九歲仍就漏西之塾

自記予以塾況爲歲之豐凶是年耕而不穫復困甚以一簣質斗米於里中富家幸見許矣比明倩力往丙子汲水熱釜以待予出入候望者久歸則猶夫空囊也釜水沸不可已予笑曰爾時且浴未暇爲炊 四月友毘

陵須西來黃含仲憚上賓毛怡孺諸人

庚午崇禎三年三十歲館於夫椒之張氏三月作誓筆
文七月錄遺不與以乏學師例餽也八月病瘧
自記予既被遺無賴宋氏北翔復蹶於童子試相挈至
浦君襄家放浪湖山爲樂每遇酒酣輿發輒裸裎狂叫
或辨難蜂起或危坐促膝耳語喁喁不可解者久之遂
相抱大慟慟已復叫如是半月意盡言歸歸或病瘧逾
月強起則北翔去世已十餘日矣予不知也過郡哭之
爲文徧募親友以慰其存沒之感雖稍稍就緒而亦弗
克竟也

十月次女生寓於毘陵

自記予以亾友宋子故滯迹郡中家無寸桂粒米之儲
且內子素艱於產至是將坐蓐予心憂之或勸予歸予
喟然曰生者猶可延死者不可復必也勉畢事而歸耳
辛未崇禎四年三十一歲館於沙灘之吳氏四月復徙

歸於前亭里

自記大父以家難故自前亭里徙居夾山幾六十年矣
大父嘗曰子孫如幸成立其歸守邱墓無忘漆沮諸仲
父益貧折不克自振予復躑躅武宜錫三邑間靡有厥

居大父之志竟不遂今年四月因舉族喪至前亭徘徊
風景不覺泣然有黍離之感乃挈婦來歸數指之外一
筭而已偕族第協之僦屋而居實左右焉協之名寅恭
五月迎五仲父母歸養

自記大人六雁行諸父多早逝無子尊行止三仲母及
五仲父母耳五仲父母復老而貧無所歸養予嘆息曰
家世不造諸父凋零存沒之責皆予責也且予每以二
人早逝不獲進一日菽水之奉爲終身憾今仲父母猶
父母也孝養在志奚有間乎遂迎之以歸

七月過郡哭臧子瑞徵 八月作兩世行略 十月
作年譜於沙灘之塾 十二月作自壽文

壬申崇禎五年三十二歲館於沙灘之吳氏 二月五仲
父卒

自記頻年饑窘至是筆耕所獲頗有擔石之儲叔姪歡
聚以爲倖事未幾仲父疾革不起醫藥殯殮之費踰於
所入四顧復見蕭然之景諸父中五仲父尤誠篤大人
沒後予依於其家猶子之愛恍如一體暮年窘於飢寒
不克朝夕藉使稍延數歲觀予身列賢書得以從容晚

景少展言笑似亦非大難得之事乃天不祿善阨以終身至一日溫飽之適亦不相假也痛哉

三月禮經澤書成九月族兄知白卒十一月院

試錄科十二月赴建寧府知府周詡爲之聘詡

爲名昌儒崇禎戊辰進士

癸酉崇禎六年三十三歲寓建寧府六月旋里七月

讀書於漏西之塾八月鄉試

自記八月初吉負笈至南都旅於方覲虞家試事甫畢

資斧已盡與蔣沖之徒步歸復積勞發病喘息委頓至

溧水囊垂乏食以推子平與沙漲楊友傾蓋得一飽兼

載後車乃達瀨上誠逆旅之一奇也

九月中江寧鄉試第十六名謁老師徐松濤於姑

孰徙從兄伯緘歸前亭里諸父中三仲父母最

貧兄伯緘又多病不能耕作飢困益甚子居殷墅

乃徙之歸於桑梓爲僦屋以居稅畝而食焉十一月

月葬族兄知白於無錫之孔山嫂路氏祔十二月

會試北行

甲戌崇禎七年三十四歲旅於京師三月南還五月

甲戌赴浙江金華府知府路修期之聘 修期名進崇禎

戊辰進士 九月旋里 九月以族兄知白子天正

歸塾

自記正姪少孤貧不能讀乃并其二庶母一妹皆載以

歸延師王元履教之與子孫驥及宋北翔子魁春同塾

乙亥崇禎八年三十五歲赴太平府推官徐松濤之聘

四月詩經澤書成 五月歸里 八月為子孫驥納

采於徐氏

丙子崇禎九年三十六歲入南都學

自記祖制孝廉下第即入監讀書課最積分方咨送禮

部應試曠學有罰國初胄子之教意有加也今日遂為

濁流所居至於孝廉坐監尤極簡脫不過謁見領文書

而已予於丙子初月循例一往時大司成張印岩名四知

自三月娛濱陳公卒 往金華 七月旋里 九月史

綱成於舟中

自記會試北行舟中無事因纂輯洪武至天啟朝事績

以綱目書法書之其於太祖凡四紀元謂始生元年起

兵元年吳元年洪武元年也

又十二月作後自壽文

丁丑崇禎十年三十七歲寓於京師二月會試三月
自中狀元劉同升榜進士二甲第四十八名四月觀
政於大理寺

自記例進士殿試後唱臚謝恩必主闈家資憩息供飲
食近且有以居停得援者予北上之日拜主祝曰兒此
行幸成名立朝誓生平不識一闈至是執不往闈初而
怪再而詬三而毆及班役失冠予踽踽急行弗顧也
進士觀政聊以故事視之書卯而外竟寥寥無一至者

予無日不往馬力不足濟之以步班役哂之字曰歎爺
五月假歸觀政畢例得乞假歸里五月出都六月
旋里七月以毛怡孺子成孺臧瑞徵子履耕歸塾

自廣九月廬於虞山之墓其二百五十年始四世孫
自記予痛念幼失怙恃長而飄零生無以養死無以葬
歲時伏臘不能以禮鮮民之疚抱以終天策名歸省宛
轉邱墓間惻從中來竟不能去乃結廬墓左枕塊寢苦
朝夕展拜以當定省暇逸則習射服勤風雨則讀書稽
古爲期三百又七十日當喪制三之一非敢曰行古之

道也人子有善則歸諸親抑必至之情耳竝立主
自記家世替衰先人早逝諸父貧折遂翦四支予與伯
兄耕讀久不逢年烝嘗之義缺焉不講乃於墓左追立
木主自曾祖考妣王考妣先考二母及諸仲父母之無
嗣者凡十有二主龕而祀之以義起也 築塋
自記虞山之墓自右至左共二百五十畝四世祖妣鄒
母爲主穴昭爲樂耕考妣穆爲高伯祖東山公又昭爲
高祖味間考妣曾祖覺菴考妣築於域前先考妣塋在
祖塋北另起一峰大人葬先慈時棺而不槨葬大人因
之土封而已王考妣塋在蕃宣公兆右頗阜峙形家每
爲予言不吉予以力薄無可如何至是越歲已遠不忍
更遷乃築土培之規制初立將有待也凡碑石之圯者
計修松柏之毀者計樹躬親畚鍤三月而成嗟乎祖宗
一坏土守之實難願我子孫時厝羹牆之感
十二月立碑 刑部侍郎嚴公來致墓銘副使蔣公
如奇書丹立墓左 爲從兄伯緘娶妻
自記伯兄貧不能娶予爲之聘於前湟張氏至是于歸
越歲生子諸父六雁行爲之後者惟予與伯兄兩人伯

兄甫生子及驥兒亦止兩人伶仃之患每爲太息伯兄
復多病予且戎馬從行益悠悠我懷已

作除夕詩

詩附

逼歲青陽屈指臨撫然時與事俱新

其憐已往等閒度獨惜當前一片心愛日詎能追在
昔終天徒自愴於今陰風闐寂哀山鬼嘯入疏櫺助

短吟

戊寅崇禎十一年三十八歲廬墓 正月作元日詩有旭

涵萬象新春氣霜凍寒廬舊日情之句 四月作桐

華篇 壟有枯桐一株枝間蛛網成孝字桐載華作

詩紀之

詩附

孤根已瘁久而童分棄巖霜栗栗風詎

意天心勤篤物不偏春氣到枯桐十年計樹先人澤

一日回榮大造功好護新枝勤自漑彩雲畱待碧鸞

封 六月晦辭墓作告主文 七月赴都謁選 八

月寓居於淮 東兵窺關齊魯告急兵賊縱橫不能

進退遂寓於淮越月至濟寧遇兵變倉皇而返 十

二月以詩哭大司馬九台盧公 盧公名象昇字建

斗號九台宜興人天啟壬戌進士授戶部主事出守

大名以殺賊功擢副都御史撫楚復以殺賊功晉侍

郎晉尙書賜劔印總督宣大其臨陣以麾幢自隨傍
睨他騎距躍輒上奪其刃便以殺賊又好將輕騎棄
大營數十里趨利益瀕死者屢矣然輒免往往取勝
崇禎十一年十二月與東師遇於賈家莊大戰二日
礮盡矢窮猶震呼手擊殺數十百人身被重傷沒於
陣公至費縣聞報結壇於野爲位而哭作詩紀之有
誓飛鐵騎將軍血肯受金牌廷尉章之句

黃石齋先生書致禮問

己卯崇禎十二年三十九歲三月至京師 四月欽授南

京戶部主事 七月涖南都任

自記南戶旣係閒曹主政無差猶屬散職隨班書卯之
外飲酒賦詩而已署後有燕處軒閩二兌謝公題云環
堵清齋閒度日當窗古柏欲參天予驟然曰何巧合也
先賢畱句待我矣雖然署日雖閒豈宜虛度因改爲環
堵蕭齋宜靜日作二詠紀之小加理葺移几榻於中自
公之餘展編獨坐戶屢聞然鳥噪鼠窺始而相猜繼而
相習覺晴雨晦明皆別有遠致也徘徊月餘逼於外差
遂成空谷迄於簿書冗沓心瘁日促時一迴憶之迥然

道俗之辨已

時九月涖兌差分司之任部有倉有兌倉儲米以待

公乏兌則收外解所入計數給軍習偷弊滋奸胥營窟

弊甚至解戶公行賄遺名曰茶果官享其一胥享其十

式解戶既病米益糠粃又斗斛低昂操縱在手軍解俱

病公初至任胥以例進公笑而受之明晨出例而置

役胥于法胥頓顙流血軍解皆為哀泣求釋而後已陋

自規既洗解免苞苴軍餘顆粒矣外解一苦于賂遺

再苦于稽候公擇其圓潔者即兌解戶朝至而夕畢

事莫不德之

自記軍給籌入場望期盼盼苦於月挈囊嗷嗷苦於日

予旦捧部文夕而給示霜月在屋叱車而驅軍譁於途

日入場看見曉星天有個官兒不要眠蓋小人之情朝

與四焉則喜也

宣十一月辭兌差離南都部堂仇公名維楨以北新

田關委公公辭仇曰資例有定辭者之矯適成爭者之

自紛羶潔在心耳寧貪泉之妨夷飲乎公迫於義乃受

與氣割以二十四辭兌差離南都

庚辰崇禎十三年四十歲正月涖北新鈔關分司之任
自記內使崔璘在浙督察鹽漕糧餉諸役關使謁之例
用衙帖予初用侍生璘不受予詰闖者曰何爲曰須改
官銜予曰是奚難但慮過倨不堪耳援筆簡額作欽差
戶部督理北新鈔關分司十八字璘嫌字太高不受予
曰欽差二字可書下乎官有內外敕無尊卑予不敢辱
君命也璘無如何相見而不受帖每交際則以兩帖隨
璘終不受予終不易璘來騶從直至堂署予往如之璘
爲氣阻

二月中明課則 啟禎間每兩加解一錢六分謂之
加一六加之官而未及於商也而官乃移之商商已
視爲成課公之任甫七日卽悉捐一六不入商課遠
近播傳額首頌德

草長單 閩廣雜貨例到關報稅約歲納若干免其
零報初不過柴炭魚菓四單後增至百餘單商乃大
困公痛懲積習盡拘原單而草之令於衆曰除柴炭
重載外有言單者罪之具文達部勒石關務
撤巡夜 役倚差剝商令盡撤之

免雜稅 肩販雜項率苦稅少而費繁下令免之

定漏稅罰例 奸商漏稅祖制極嚴後惟以意行之
爲厲不測公定其則量漏多寡准稅起罰勒石關務
五月設捕防廳 關設外郭伏莽可虞乃捐貲募士
加以廩賞躬自訓閱命客將余師貞統之具文南北
兵部及浙撫按立捕防中軍廳時饑盜充斥一境晏
然公更以其暇講武習射於圃中

七月出示免稅 淫雨兼旬米價湧貴商舟不至公
免其稅以招之未幾舳艫漸集馬素修聞之寓書曰
近聞武林政績知門下所在爲景星爲慶雲爲和風
甘雨王端毅劉忠宣之業不又屬之門下耶至於米
艘盡捐稅額杭城萬井人倚更生此尤有轉移造化
之力真五色補天手也吾黨有人吾郡有人天下有
人矣其爲時賢之推服如此

八月從子孫正補無錫弟子員

自記予改天正名孫正孫從世碣正從父命也字寅叔
時年十五其爲人卽之溫溫儒者顧獨伉壯負膽略工
騎射尤善運槳旋轉便捷飄忽能踴身躍起丈許有立

關僧拳棒罕敵客有請觀其技者孫正以寸木擊其母
指立破之遂以藝勇聞與同里張夏最友善夏嘗敘

公年譜而梓之故其書獨傳

九月拜謹陳權關四弊疏

十月季試捐俸課士拔其尤者結問社朔望爲會
得張玲翁遠業等三十人

十二月賑飢于接待寺歲饑買米助賑人半升間

日一給凡給米二千石賴以活者萬人作賑飢錄復
念天災流行民皆艱食特爲減餐屏音樂止會燕茹

蔬食粥誠妻孥力行之時有謠云湖州墅上三般寶

清官妙藥靈神道武林門至關前十里名湖州墅謂

公清官及姚生醫藥武安王廟靈筭一時三寶也

辛巳崇禎十四年四十一歲官於北新關

二月離任商人感公之德醵金立碑以永去思工

部卓爾康爲之記末云予歸里經年老病不入官府
未識公面且公已代去豈復有阿私朋比之嫌縱筆

作記通告同人俾知天下固自有真正用世豪傑在

三月部假歸里司權及稅約省商四萬金比歸行

李蕭然戚里失望公慰之曰某三十年老句讀也設
一旦歸而黃白滿筭頓改當年顏面不祥孰大於此
今吾自足吾分耳非矯也

四月書上挹齋周相國

書附

挹齋名延儒字玉繩宜

興人崇禎二年晉東閣大學士後罷歸辛巳四月再
召謁者無虛日公獨不往挹齋雅重公屢使人邀之
比晉謁就坐公無一語挹齋徐曰仲緘亦有所囑乎
公曰某今亦何求但得一極危極險之地足以畢命
朝夕者於願足矣挹齋默然公退上書規切之書資

今之庸庸碌碌奔走於師相之側者不過以師相受
眷特隆再登揆席不陽爲媚悅之言卽陰爲身家之
託從無一人論事懷憂獻一得之愚者考之古人布
衣猶得奏計於廟堂今乃祿位晏然唯諾是具竊用
愧之允錫幼讀父書長蒙君錄夙荷師相之獎成敢
附古人之大義謬以目前之急爲師相敬陳之皇上
英武間世勵精邁古而謀惑日削未奏膚功者其故
有三一求治太急一執念太堅一進退人才太輕求
治太急則不熟籌時事之緩急輕重慎措其安以徐

俟其定而一切功利操竊之說得以中之執念太堅
則未暇爲虛中遠鑑投水轉圜之美將過施非分之
福輕加不測之威而佞倖僻詭之說得起而伺之進
退人才太輕則昔進而不知其難今亾而不知其易
片言而升樞秘一旦而受榘楊天地之生才有數豈
其今不逮古然而所用非所求所舍非所棄將僥倖
苟且之徒益得起而嘗試決裂之凡此皆君心之未
靖以致國運之日靡古云君心卽天心也或者天心
悔禍牖我皇衷師相一出而圖吾君則啟沃之功其
首務矣京師天下之元首東南天下之腸腹齊魯天
下之咽喉秦晉天下之肩背楚蜀天下之股肱今敵
阨吾首寇軼吾肩漸及於項東南杼軸日繼腸腹已
空齊魯饑荒盜起咽喉道梗揣今所急寇不過志圖
剽掠得志之後氣怠意盈盤結險阻苟安旦夕數月
之內未卽猖獗敵覬覦叵測日伺我隙時而驚伏勢
必狼奔鳴鏑之舉已在眉睫一旦毀邊南下扼臨德
擊晉趙掠兗豫據要阻援京師受困竊恐彼中風土
相習無俟秋高此際情形已窺未肯飽去天下之禍

未知終始譬如久羸之人當此急症既欲治標又欲固本太急則虛弱不能支太緩則怯潰不及救爲今之計莫如姑省楚蜀秦晉肩股之力整飭燕齊以通咽喉屯田訓武招散集亾先宿重兵以壯京衛以防敵衝無事則居重足以馭輕既可辦寇有事則先備可以無患尤能却敵此爲上策若夫老師宿糧以從事於方張之寇則出沒盤踞既非歲月可了敵一犬舉元首已病咽喉梗絕肩股外裂腸腹內潰雖有盧扁無所施其技矣古者吉甫方叔北治狄南治蠻不過二三元老今敵橫寇跳而建牙擁旄者多至四五十輩一羊九牧權分力輕於以却敵滅寇必不然之數也以錫愚慮莫如併歸一路責重各府九邊止設九督一切戰守機宜悉以委之許以便宜行事不任不遙制則無委卸掣肘之患矣沿邊州府俱選才武甲榜優以道銜使領府事一切戰守機宜悉以委之撫總其成府宜其力無事則畫疆而守有事則荷戟而援則無觀望離潰之患矣至於京師左右陵寢之地當設督臣二員訓兵屯田使屹成重鎮以壯畿

輔之威備援勦之用蓋今之弊莫甚於但知重邊而不知重腹夫所重在邊不過一邊之用也弊在尾大唐以召亾所重在腹則秉樞四應不徒一邊而九邊之用也利在幹強周以永祚譬之十萬人分十則弱合一則強倚邊則空居中則實兵法所謂善守者無所不守名似簡而勢益增者此之謂也以之滅寇亦然歸重該撫責成各州密布置謹偵邏翦遊掠散其黨與離其腹心朝廷簡名將發三萬人賫二月糧而寇亾矣故辦敵在戰貴以守爲戰辦寇在撫貴以勦爲撫然而一事權明地利輯軍心其首務矣書上挹齋心是其言然竟不能用以致於敗

五月家譜成 堵氏先有心瞻我樹二譜皆未竟之書公纂輯逾年至是刻成頒示通族

祠成

自記合東西兩分爲長發祠以一世祖考妣二世祖考妣三世祖考妣凡十主爲正祀外拙誠公考妣惟學公樂耕公考妣東山公味間公圖南公心瞻公予考冲宇公孝節許母徐母凡十二主爲特祀虞山墓左舊有享

室葺而新之爲虞山祠以拙誠公考妣樂耕公考妣東
山公考妣味間公考妣凡八主爲正祀外覺菴公考妣
月川公考妣心瞻公孝節許母徐母予考冲宇公二妣
胡母陶母凡十主爲特祀

置祠田 以二百畝入長發祠百畝入虞山祠輸糧
之外備春秋祭燕兼以養老贍貧賑孤恤寡酌租之
盈縮以爲常

大合族 鼓樂迎主子孫以次拜謁祭畢遂行燕勝
衣冠者一百三十人成禮而退

六月陞南京戶部郎中 八月陞湖廣長沙府知府

十月涖長沙府任 十二月賦天心篇

朝廷以流氛肆禍省躬罪已頒詔大赦公拜詔畢念
湘土逋賦九重沾濺獨隆皇仁卽天心也賦天心篇
十六章以頌之

壬午崇禎十五年四十二歲官長沙知府

正月爲餉科所劾 初公涖任甫數日餉科黃雲師
過府舍諫於堂未有以應公前謁晉接甫定黃卽厲
聲曰貴府逋多無逃白簡公以受事未幾對黃又曰

如某某者以未任被謫何言暫也踞而左顧公曰足下必以簡書從事當今主憂臣辱斧鉞允宜某無所辭罪遽長揖出既而提經承亦不與及是果爲所劾劾語云長沙知府堵允錫倨傲鮮腆恥事催科臣不得已提其經承則曰我卽是經承任憑參處者奉旨該撫按申飭

二月作星沙城守議 公在任與司理蔡公道憲相倚重遇事咨而後行值流氛日熾湖南恃江湖之險有司泄泄處堂公與司理私憂之乃作星沙城守議略云大抵通郡形勢負山面江有險足恃上策以戰爲守守南山而敵人不敵踰險守撈河而敵人不敵飛渡守江州而敵人不敵艤岸樵採不竭市肆不驚氣展刀餘居中四應十萬之敵不能攻也其次以守爲守南守崗東守坡北守濠西守岸資山澤高下之勢以爲屏蔽可進可退立於無畏養銳蓄力伺隙而動亦可稱堅城焉其下則依垣而匿耳增修女牆多設窩鋪編氓而立比戶而饋繕器備用閉門自畫以當百千烏合之衆數月之守或亦可堪云云

撫院以敕書至府 楚撫宋一鶴移檄各府措銀五
千採買軍米公無以應未幾一弁以令箭至公曰此
行間物吾受命守土軍容不入國也于是差官以敕
書至且爲檄曰官參吏斬載在簡書參不足道也若
斬令則已行之孝感矣見者失色公不爲動越月自
賫敕書往謝會所採之米已畢輸宋亦無以難

三月致科舍於獄 漕科陳泰來督漕於會檄舍紛

擾瀏陽簿樊朝楨舟至撈塘過夏姓者鎖而曳諸市
既入舟飲其酒狂叫終夜晨又曳之樊不勝忿乘間

投於水湘流湍激不及施救夏方盼盼然視其與波
俱入而徐俟其與波俱出也謾曰官死解存父亾子
存速爲我覆科主課索如故公聞之髮上指手縛夏
致之獄詳諸三院并請于陳陳怒將繳敕以待命會
三院俱不直陳曲解而事寢

三月戒嚴巡守 劇賊甘名揚等聚衆山洞四出劫
掠殺官兵陷平鄉湘北大震公督兵壯巡行境上結
堡團甲緝奸遠候遂得不犯

子孫驥補弟子員作詩并字說寄之詩有爾讀書能

苦予爲官日貧之句

五月勦臨藍賊殲之客將余師貞戰死 臨藍賊蕭

相宇等糾中原潰卒粵西生猺各洞靛賊諸鎮老馬

子合隊焚劫進攻寧鄉縣縣令飛檄告急公于戌刻

聞報卽舉炬發兵誓師渡江合得百五十人選驍卒

三十人給以馬命客將余師貞統之爲前驅公率步

兵居後時傳賊銳盛圍寧數里同列以孤軍難進謂

宜中途觀變公慨然曰赴急如救焚豈得需次且賊

非有成謀不過乘不備以掩我耳聞救速必疑大軍

至當疾走此兵機不可失也比至城垂陷賊愕然相

顧曰何捷也拔營遁追之及於大虎坪師貞一發殪

其魁僞王廖二慶殿後師貞復馘其首諸軍繼進斬

百餘級賊駭散狂走荆棘中比登高見幟而甲者僅

三十人餘皆寬博徒手也復諫其徒返爲長圍裹我

軍師貞策馬疾衝之格殺過當賊復至會天雨泥濘

師貞以馬蹶見害賊得脫去公憤甚壁於黃柴檄新

化武岡黔陽兵會勦賊殲焉劊蕭相宇腹以祭死事

者

立鎮南新營 初臨藍賊犯府設鎮南營兵百人公
鑒寧鄉之役復立新營合將卒二百七十人府自捐
餉歲三千金 吉藩左承奉司黃鳴治有腹校
勦百家山賊平之 劉國名糾巨盜萬大萬二搖賊洞丁遊僧千人立寨
百家山旗鼓恣劫瀏陽縣令捕之國名率衆圍殺斃
十數人擒數十人顯以金錢贖放公不勝憤俟國名
入城縛之獄發兵勦其黨山洞以平

六月剖定欽案 科臣史可鏡紳衿構難一案各樹

黨攻劫焚殺日尋獄數年不決公喟然曰鋤強止囂
正太守事忍使一方鼎沸坐置不問乎設激變意外
伊誰之咎乃呼史紳語之曰汝釀禍有由予不能汝
庇也其速出子弟臧獲就理無後呼諸衿語之曰汝
樹幟倡衆豈臥碑所訓且致獄有年矣諸生豈無遠
大自期者以諸上進殉一廢紳非策也其靜無譁譁
則小而申飭大而入告法不汝貫也呼衆款犯語之
曰汝多人果係受抑者入理株連者速去反坐有令
叫競有誅榜於衢令鄉保比家而守有謀聚者擒之

擒一二人置之法市閭閻然聽之日於諸史內讞其悍橫者諸衿內摘其豪強者坐之逋逸者免株連者釋凡決三十餘詞犯証在門者千人一日而畢紳衿咸服又欽案李象珠汪韜等十餘詞亦以次剖定榜銷崇禎十三年以前積案湘俗喜訟案牘如山上下書胥相比每以催提爲奇貨公知其弊簡十三年以前積案徹底詳銷榜於衢凡三千餘件修長沙府志徵郡中文人十餘輩共事蒐討而公手裁之書成咸稱直筆

七月定民之譁爲吉藩所劾長沙善化之田投入吉藩者凡十之五逋糧卸役郡縣苦之至是復與民爭田訟之郡丞王秉乾丞以田給主者宗乃譁公諭之頗唯唯翌日民榜書王平日之所爲揭於衢王怒闔校四出撲捉里民業稍溫者幾無噍類初三日酉刻民於南倉一呼而應者三千人將及夜踰城焚藩哭聲徹野公聞之叱御不及單騎而往私念氓無知縱之則禍不測激之則禍不測有設法以散之徐啟王而善其後耳乃令吏傳呼太守來爲八硃字以狗

曰受冤則告妄動者斬密使營兵夾倉而陳民稍定
公呼其渠而語之曰汝輩誠冤然無徒自苦其悉具
詞於予予爲爾理之民唯唯受千餘詞公謁王曰潭
州王湯沐邑受之天子者也無民則無依奈何使怨
怒至此王謝不敏立摘翫法者數人杖之百以自解
公因令於倉曰後去者誅事既定吉藩左承奉黃鳴
治以劉國名故忿公深譖於王曰府與廳盟以爲此
難也又曰府鳩民於郭而斂詞於堂也王惑之遂爲
所劾

八月勦燕子窩賊茶攸之間地連衡永巉岨絕巘
一望無際賊黨盤據其間屢捕不獲未幾糾合亾命
及詭賊閩賊共七八百人爲劫於醴醴告急公率兵
往賊讐公威名紛紛各鳥獸散公深入險阻截其渠
李鬍子草上飛等數十人而還

九月罰俸吉藩劾疏旣上長沙善化縣民叩閭訟
冤公拜直陳顛末疏旨下撫按察奏罰俸一年

十月余師貞廟成以文祭之

文附

維崇禎十五年十

月之望長沙太守宜興友弟堵允錫謹致祭於明故

守府將軍雲岫余公之靈曰嗚呼余公既智且仁奮
騎逐賊舍生而成精爽不滅功澤在人人各有心於
公是憑於以尸之廟貌孔新於以祝之庶羞維馨小
大具哀涕淚共零初奠者誰長沙太守握符秉旄鎮
蠻殄醜一朝不戒羣豕突圍揮戈投袂子先羣後欲
報使君目無全寇害實不恤功則不有鷓性逐爵若
天而授公其歸來酌公以酒嗚呼酒初行兮酒氣香
肅我冠兮瞻我裳功在社稷兮不忘名成十二兮無
雙再奠者誰軍主堵公整師逐賊予權子鋒絕流晨
馳武服是供長策決圍短纓驟風奪賊之魄顧盼益
雄勵衆作釜賊魚於中賊首纍纍余嘉乃功生氣殺
賊勁氣在穹嗚呼酒再行兮酒味冽放予歌兮雙劍
白將軍陣上兮戰急將軍廟中兮髮直三奠者誰友
生堵子憶公初生與予同齒十載周旋我我爾爾正
氣雖存良友已逝死喪孔懷於我無所惻惻中宵隱
憂未已瞻彼江流鼻泗顛泚殲我良人子予之臂嗚
呼酒三奠兮酒聲哀死千秋兮主誰歸將軍俎豆兮
崔巍故人樽酒兮徘徊尙饗

自記自余師貞陣亡募壯士不可得偶於獄中得徐鳳
崗者力能負銃而戰禮而用之屢入險勦賊嘗帶馬落
澗中賊以鎗擣其口忽口拔鎗鏃躍起大呼砍殺百十
人莫有當者鳳崗湘鄉人也後以病終
十一月入覲 各臺以藩効故題公入覲既而悔之
則公已登舟矣居民歡送夾江而行聚於湘陰雖禁
之弗止也

十二月寓於京口 公自洞庭沿流而下月餘始達
京口已聞有邊警至淮安報益急乃還寓京口

癸未崇禎十六年四十三歲寓於京口 二月渡淮 四
月達京師 自二月末旬聞邊騎漸遠乃合隊而行
趨避於津涿間久之始達時京師尚未解嚴驗文散
髮而入公喟然嘆曰此一門者華夷之界也當今安
有九邊獨有皇上九門耳爲臣子者能勿愧死時主
於族兄士鳳家

五月覲計典竣舉廉卓錫宴禮部奉旨加二級復任
六月至京口便道旋里

七月祠規成 公以約束通族勸耕讀講仁愛不可

無規乃分孝弟耕讀廉讓慈睦數則及冠婚喪祭之
禮勒爲一書至是成告主頒行赴任

八月復還里 舟至蕪湖爲盜所劫墮水瀕死脫走
草野稱貸至家重整行李

葬娛濱陳公及許夫人於湛濱 公念外父母之德
不置慮四方多難從王之軀得暇無幾遂卜壤於湛
濱而葬之有記文二勒于石

赴任 時聞獻賊破武昌大江路絕乃取路浙會召
募丁勇始行 十月至蘭溪聞寇陷長沙 十一月

至江西廣信府水陸路絕慟哭而還 自蘭溪至龍

游遇長寶道馮某長沙令吳某自楚倉皇奔走見公
錯愕相顧急搖手動目謂賊鋒盛不可赴死宜且觀
望勿前公切責之兩人者不顧以印付公竟去公益
憤激進至廣信府城門晝閉士女逃潰所在俘掠兵
賊莫辨不得已還寓衢州

十二月自錢塘還寓毘陵有答鄭又日詩 詩附 辛苦

篙師費往還多愁知己惜愁顏只今天地干戈裏自
古功名朋友間雪夜捉刀爭向蔡樽前聚米忽成山

同仇莫賦無衣句投筆猶能到玉關

拜復任路阻疏

歲除過虞山故廬守墓

自記時已逼歲羈旅之臣不安家處乃之虞山守墓正

月初吉拜墓而行

甲申崇禎十七年四十四歲廬于虞山之墓

正月至南都謁史司馬可法袁督師繼咸二公海

內人宗也共以國士見許委以長沙監軍之任公慨然接浙而行

二月同巢僉憲出師復楚

三月復任賊之畱屯未去者公以次勦逐乃修城

濬濠飭樓櫓集士民共守之

作哭江行長沙司理蔡道憲字元白號江門晉江

人崇禎丁丑進士居官以直道自守與公素稱莫逆

交癸未五月賊張獻忠陷武昌進陷岳州後復圍長

沙道憲督將士城守甚力賊遙謂之曰軍中久聞蔡

公名將大用公公無自苦道憲手注弩斃其渠賊怒

攻益急城陷道憲被執賊委曲諭之使降道憲嚼齒

大罵賊賊磔之部下士林國俊等九人追侍道憲不
去賊初勸道憲降國俊曰我公若肯降者去此久矣
不至今日賊云爾不降亦不得生國俊曰我等若畏
死者亦去久矣不至今日賊并殺之內四人奮曰死
固所甘願葬我公而死賊義而許之四人解衣裹道
憲骸瘞之南郭乃自剄公悲道憲之死作詩哭之序
曰蔡子之死於湘南也予驅馳往來洄游中流如見
其人烏得不哭兼哭一時共難諸公哭聲與江聲俱
永也作哭江行

四月作墜龍騷 聞京師三月十九日之變痛哭幾
絕作墜龍騷五章

五月福王卽位於南都 福王名由松神宗孫以初
四日監國十五日卽位改元宏光
陞武漢黃兵備副使 六月蒞分巡道任駐於黃州
七月平戈陳五族之亂 戈陳者漢王陳友諒之裔
支庶繁衍分爲五族盤踞瑞昌興國間其人獍面豺
聲輕生好鬪往往徒手搏虎豹無所畏及是乘變爲
亂攻城掠邑無虛日烽火及於黃州公曰狂賊陸梁

我不急討養成大惡是又多一張獻忠也乃授方略

於諸將徑搗其巢五族者震恐喪魄相率詣軍門叩

首乞降江楚復定

九月改湖廣按察司副使加一級提督學政

十月會講於武昌府之學宮公雖改學使而訓兵

講武勤倍曩時注意人才旁採謀勇以國仇未雪爲

深恥居恒扼腕太息常恨未獲死所因進諸生而諭

之曰千古學術之大莫切於明倫今日明倫之要莫

切於君臣諸生試想二祖列宗休養之隆大行皇帝

賓天之慘目前立於明倫二字之下覺不共之仇一

日不復則君臣之義一日不明然復仇之舉不在事

功而在志節復仇之地不在疆場而在衾影蓋滅賊

必須人才人才發爲經綸經綸本於學問學問根於

忠孝諸生刻刻以忠孝爲心務求俯仰無愧在家爲

彥士立朝爲良臣則起居動靜皆是復仇之時皆是

復仇之地所謂不待舉而後加者也

拜及時修復事宜疏其一論取士之法略曰竊維

制藝非古也國初亦不獨重制藝也制藝之重始於

成宏至今而極重乃成極弊臣以爲取士之法莫如
實行三試歸併二科以德行政績言品爲第一場德
行者學臣條舉士子孝友之實是也政績者凡司府
州縣儒學之首領佐貳學臣皆得薦舉如古徵辟之
制也行徵辟之制有五使諸士有練達之功一也州
縣有任使之員二也國家得士而後用之士不至有
以官爲試之患三也士子愛惜進身之始居官必清
謹自守四也卽薦舉之得失以驗學臣之賢否五也
言品者古慎言之法一寓目而了然一啟口而曉然
也以制藝策論判爲第二場制藝以觀其理學策以
觀其時務論以觀其宏博判以觀其律例書一經一
策二論一判二亦七篇以韜略騎射爲第三場此取
士之法也臣法若行則朝廷無文武之異局封疆無
文武之殊觀并鹿鳴鷹揚之二試文學武學之諸生
而合爲一科以羅天下之豪傑使文不爲堅瓠武不
至躍冶於以復古濟艱此其首務矣

立僑學於漢陽 流寓附籍

乙酉年四十五歲提督湖廣學政

正月會講於武昌府之學宮 時事日非警報踵至

公止辦一死以報國進諸生而告之曰講究理學者

所以砥礪名節砥礪名節者所以發皇事業蓋士一

身而百行備焉而明於義利死生之辨於以入聖躋

賢思過半矣試以義利言之義者高遠難卽利者卑

近悅從今欲祛千駟萬鍾之奉退而薇食瓢飲甘苦

殊絕豈易以矯語欺人孔子不云乎富不可求從吾

所好義者我所自有也利者我所不必有也不必有

者求諸人我自有者求諸己舍我所有求諸非分一

朝詭遇千古蒙譏西山之歌與牛山之泣孰得孰失

孰少孰多必有知其解者矣更以死生言之今使置

人於刀鋸鼎鑊之旁而從容而告之曰爾必舍生而

取義此亦難入之言也然而爲是言者非欲人輕性

命也正欲人愛性命何則性者與生俱來命者天衷

所降極古今忠孝節廉可驚可喜之事皆吾性命中

所固有能愛此者堅於金石壽於山嶽生固不朽死

亦不朽至於今人所戀戀者非性命也血肉耳官骸

形器參養以成永者期頤促者童穉吉者邱隴凶者

溝壑不爲鳥啄卽爲蟲攢是不特當其死而非吾有
卽當其生而亦非吾有也吾不愛己之有而愛鳥鳶
蟻螳之有清夜自思有不啞然笑者乎故世而有真
能愛性命者視死其如飴無俟慷慨以趨直可從容
而就也
三月巡試湖南途遇盜公從容諭之盜皆額首避
路更衛之行

謁督師何公騰蛟於長沙府騰蛟以舉人出身累
官僉都御史巡撫湖廣後進太師爵世侯其爲人智
深勇沉嘗率師全桂林取寶慶復全永諸州與敵大
戰於嚴關日越橋舉旗斬將所向克捷士氣百倍江
廣大定己丑正月檄諸將集湘潭謀下星沙北師驟
至湘潭陷騰蛟被執勸之降不順命絕粒七日不死
復勸之降騰蛟躍起大罵遂遇害時以總督五省軍
馬駐節長沙公謁之進足餉輯衆之說掀髯鼓掌絕
不作瑣瑣態騰蛟深器重之

五月南都潰六月立君子營南都失守報至公
痛哭三日設科募士或則幼讀詩書長嫺韜略或則

年力壯茂慕義從軍以至一材一藝之士皆聽入募有應募者公親察土著慎相法驗膽氣膂力共得三千人分爲十營取越王句踐君子六千之義不謂之兵丁而謂之君子以崇異之一時共事有章曠楊培東等曠初知沔陽州方獻賊之謀躡楚也江上無敢行者曠從一廚夫覓漁舟盪槳密覘之知事已迫傳檄遠近兵漸集獻忠西走武昌諸郡復定人服其勇云後代公巡撫湖廣

閏六月唐王卽位於福州 唐王名聿鍵端王孫崇

禎五年嗣立至是以閏六月十五日卽位於福州以布政司署爲行宮改元隆武

八月陞都察院僉都御史巡撫湖廣 督師大學士何公騰蛟薦公才可重任遂有是擢

九月往荆南撫李錦等三十萬衆以歸 逆成旣死其義兒李錦等十八部屯澧州界上號三十萬遠近大震公廉知錦母高氏有智術軍事皆取決而高氏第一功所部二萬人驍勇爲諸軍最公令具冠帔徑詣其營錦等以鐵騎數千來迎入營公以大義諭之

曰公等皆大用才前者陷身不義亦當事者之過但本朝御宇已三百年公等祖宗世食其德一旦以烏合之衆破金甌毀宗祏俾人收利自居賊名公等爲之竟亦何益今能重自湔祓戮力建功使名垂竹帛吾當與公等共之錦等唯唯欲定盟公曰姑徐之吾與公等一心報國義同兄弟當效古人登堂拜母之誼請先見太夫人然後行禮錦引高氏出拜公答拜從者奉上冠帔公曰榮命在卽預備以俟高氏喜命軍中置酒及奉伎翠翹金鈿宮中裝束蓋自燕京掠得者公變色却坐起立泣而言曰兩京未復萬姓倒懸乞錫求死無所亦復何心聽樂公等相愛宜急撒去錦益心折如命公南面坐引卮談論慷慨具陳忠孝大義及古今名賢事蹟纒纒數千言明日高氏呼錦跪庭下誠之曰使汝曹贖前罪洗惡名者堵公賜也堵公神人也汝曹不可負錦等望公叩首指天誓以死報於是李錦高一功田虎張能賀藍袁宗第塔天保黨守素李來泰馬世耀等三十萬衆皆就撫聽公節制楚中謂之十家兵云初公至錦營見被掠

者近五六萬人盡命計口給糧遣歸比公之還男女攜持夾道拜送歡聲遍百里皆曰微我公者我等死溝壑矣

拜請封諸將疏遣武陵縣舉人傅作霖賈疏詣行在作霖字潤生號九巖最爲公所器重歷官兵部侍郎死於武崗之變

十月蒙敕獎諭公疏既上內閣蔣德璟持不可御

史錢邦芑請如公言乃封高氏英淑夫人

明史作李貞義

錦左軍侯賜名赤心高一功右軍侯賜名必正號其衆爲忠貞營而別降敕獎公忠勤益勵以後效

丙戌年四十六歲官湖廣巡撫二月率師圍荊州

四月還駐武陵時兵多而餉不給攻荊州久不克

參軍趙振芳進曰我師老矣彼援將至奈何計惟決水灌城可以速下此不容間之會也公不忍民之魚持不決越二日北師果集與戰不利乃由澧水還駐

武陵憂憤幾絕題二詩於新化驛人傳誦之

武陵屬常德府

五月戰於草坪大捷公既撤荊州之圍大軍躡其

後軍於草坪公以其逼也激勵將士開門出戰敗之

拜補行鄉試疏 乙酉科缺鄉試楚人爭叩言之公
具疏請依例舉行後以軍務倥傯辭監臨之任

子孫驥姪孫正自家間行至軍 乙酉六月孫驥孫
正從癸未進士盧象觀保聚山澤間瀕於死者屢矣
竟不死乃決意入楚間關數月達於軍中公見子姪
至喜不自勝改孫驥名世明孫正名正明示不忘本
朝也正明故饒勇略卽命督君子營衆皆傾服又選
其少壯年二十內外者爲親兵每戰正明居先身冒
矢石親兵競奮咸致死力屢以克敵功膺獎賞累官

右都督同知畱守錦衣衛事世明後以恩典授江西
道監察御史

八月爲子世明復娶唐氏 公以兵革不測中歲尙
未有孫聞湘潭諸生唐鶴翥有女及笄爲世明求之
柬李鄭二生轉告以至情倘皇路清平東西館古亦
有之之意遂成婚正明亦納陸氏生一子世居於衡

云 閩都潰

十月永明王卽位於廣東之肇慶府 永明王名由
榔桂王少子神宗孫閩都旣潰總督丁魁楚巡撫瞿

增文忠年譜
式耜及兵部尙書李大器李永茂等奉王監國尋卽
位改元永厯以肇慶府署爲行宮

丁亥年四十七歲官湖廣巡撫

四月陞兵部侍郎賜劍印總督軍務 駕幸武崗劉

承允掌兵專政而高李諸將聲言欲入湖南就糧承

允恐爲所併私念非公莫能制特疏薦公加公官令

督師出江楚

七月拜請誅劉承允疏 興國公劉承允驕肆日甚

忌督師何公騰蛟權出己上請改爲戶部尙書專理

糧餉不聽及何公入朝歸長沙承允伏千騎於道何

公至伏發部下士奮力與戰盡殲之承允諱而不言

公因疏言劉承允恣爲不法截殺督師重臣請正典

刑承允見疏始惶懼自戢

八月常德陷率諸將守永定衛

九月武崗陷傳令戒嚴 北師逼武崗駕幸柳州劉

承允以城降遂傳令各營協力巡守

十一月率師復常德復辰州 自退守永定而後幾

及半載公憤無恢復期乃書二祖列宗之位北面百

拜拔劍將自刎以謝不職罪左右急抱持之公釋劍
大哭諸將亦哭三軍皆哭哭聲震山嶽馬進忠王進
才等咸請効死公乃兜鍪金鎧建大將旗鼓剋日出
戰公姪正明故弟子員卽之溫溫儒者顧獨伉健饒
膽略工騎射其來楚也督君子營能固結士心與同
甘苦士皆樂爲之用至是公命正明先登餘張兩翼
以進公督戰急正明大呼諸將應聲騰起三軍繼之
驍勇果毅莫不一當百血戰三日凡斬級以萬計鹵
獲輜重馬騾械器無算復常德進復辰州

戊子年四十八歲官兵部侍郎總督軍務

三月檄李赤心與忠武諸將合營駐常德 公慮馬
進忠孤軍難支更調李赤心等與相犄角爲乘勝東
下計有奸人鄭古春者東西唆搆諸將惑之始各懷
疑忌矣
四月北師以書至拒之 北師駐武昌使公鄉人吳
達持書來招有大者王小者侯之語公峻拒之
五月拜絕口勿談和議疏 時有倡和議者公上疏
痛陳其不可其議乃寢

七月至夔州散楚宗朱容藩之黨 楚宗庶子容藩
以便佞躡掌宗人府事獲罪當誅會赦得免遂由楚
入夔州據有王光興于大海李占春諸營兵馬自稱
楚王世子天下兵馬副元帥設官擅封拜有自帝之
漸公方統兵欲東聞之恐變起旦夕爲肘腋憂卽乘
舟至夔詰責之容藩無以對一時附和容藩者有張
京程正典朱運久等公一一陳大義曉之川中將士
始惡其名號之僞各思解散以聽朝命未幾容藩走
死雲陽

八月還自夔州率師復衡州復湘潭進至江右所向
皆克 公還馬進忠與李赤心不合恐其相圖已移
營湘南矣公乃調護諸將激勵士卒嚴部伍申約束
將士踴躍用命復衡州復湘潭鼓行而前所過郡邑
皆下遂入吉安

十月率師還駐茶陵 金聲桓以江右返正將率師
趨南京恐贛州未下議其後畱攻贛以牛酒犒師請
獨任江事公乃率衆回茶陵欲與督師何公騰蛟合
謀出江漢以窺克豫

十一月陞兵部尙書賜印劍總督軍務

十二月率師援南昌 初聲桓圍贛州未下北師救至聲桓撤兵回南昌嬰城固守北師圍之復以其餘力敗傅鼎銓敗余應柱西破丁家塘土寨江事日棘公得報卽督忠貞營兵往援之

春秋說義成命 公嘗命子世明負書居馬前已則自囊筆墨細碎諸物軍行頓舍治軍書畢卽掃地焚香啜茗紬繹春秋大旨箋釋不輟至是成編名曰說義釐爲五卷凡萬五千言

己丑年四十九歲官兵部尙書總督軍務

正月師次袁州

率師救湘潭不及還守衡州 督師大學士何公騰蛟駐於湘潭遣諸將悉力攻長沙將拔之北師驟至湘潭陷何公死之公聞變率師還救與戰勝負略相等遂率諸將固守衡州

四月戰於衡州之草橋不利還駐耒陽 陣於草橋公自執桴鼓聲殷殷諸將直前搏戰自辰至酉殺傷過當忽有輕騎出陣後陣遂動公收軍駐於耒陽而

令正明別統一軍護眷屬屯永興凡相去百五十里
永興陷從子都督府右都督同知畱守錦衣衛事正
明死之 正明屯永興北師從間道來襲正明大呼
上馬率部下死戰北師全集團之十重正明身被重
傷奮力殺斬數將突圍出且戰且走迤邐及於城濠
銃箭蝟集遂遇害年二十有四事聞贈太子太保左
都督參謀潘喆邵履正皆不屈死諸眷屬在城中聞
變闔門縱火自焚死潘喆贈禮部主事邵履正贈戶
部主事皆予祭

北師以書至拒之 北師得公戚唐鶴翥厚遇之予
以官賞使作書招公委曲諭以天時人事之說公哭
而拒之

五月戰於麻河大捷 大軍日逼約日出戰公刺血
書疏籲神畢納刀靴中謂諸將士曰兵凶戰危此行
脫不濟吾惟一死以報國耳公等可善自爲計將士
感激用命戰於麻河遂捷 公每遇戰勝諸將上功
擲級滿前血模糊積所割耳鼻突兀如山阜公踞胡
牀坐神采英毅意氣慷慨望之者皆疑爲神記功畢

公忽怡然命爲功高者奏樂簪花掛彩手金卮注酒
醕之將士益感激思奮
至廣西之平樂府公所相與左提右挈者督師大
學士何公騰蛟也何公死永興亦陷公憤甚欲入朝
面君計兵計餉將復入楚謀大舉乃檄諸將嚴師城
守率麾下三千人入龍虎關過保昌侯曹志建營志
建素驕蹇不奉法縱兵掠永郴間屢被公呵責乘間
欲害公公覺之夜走何家寨尋至粵西平樂府之賀

縣

子江西道監察御史世明卒初公謂世明曰我受

國重任非死無以報汝書生在軍無益且事不可知
汝盍行乎乃令門人李先登匿之山中出衣貲遣之
世明不可公曰父殉封疆子延宗祀亦各得之宜也
何爲而不可世明泣曰兒縱偷息人間要不若父子
兄弟死生同在一塊乾淨土兒今復何之因痛哭固
不肯去也已丑五月公將入朝先遣世明賫自陳疏
詣行在二十八日至廣東之陽山以病卒公聞訃顧
講左右曰此天命也吾何以子爲哉意氣逾奮

六月入朝陞少傅太子太師吏部尚書兼兵部尚書

文淵閣大學士

七月奉敕總督諸營以圖江楚 公屢疏請出師朝

廷嘉之特賜龍旂十二總督諸營以圖江楚

師次梧州 公既拜命即檄告諸鎮召李赤心於籐

鬱次於梧州以待之

作書寄示吳中諸舊好

書附

僕自甲申以來驅馳王

事心盡力疲幾於不可復振然而一息尚存亦何敢

以自逸也倖邀宗社之福收合餘燼迅掃狂氛揚帆

直下重展孝陵歸老桑梓所甚願也或者天不降佑

以致師徒失律大勢日非則允錫七尺之軀久不作

人間想矣異日荆溪之滑風清月白之夜有哀淒叫

空者非他人必允錫也故人不棄倘有瀝酒以相慰

者乎幸矣幸矣念錫一生初不有家棄捐室人亦不

復道止有從兄允祿從子昌明為先祖父一脈之遺

貧弱可傷故人能嗟而食之使不至溝壑則允錫生

死之感也 初公未第時所與交者凡十人號十鈍

亦曰十遁又號十癡得公書往往散去後多不知所

終

八月土寇徐彪作亂擒斬之。土寇徐彪聚眾萬人，四出劫掠，官兵不能制。公念內難未靖，何以克敵？乃率師往與戰，大敗之，擒彪斬于市。奉旨給四世誥命。朝廷念公忠勤，封爲光化伯，給誥券。公以廷臣各立門戶，軍旅齟齬無成功，惟當任罪，何敢冒恩。上疏力辭，遂特賜四世誥命以獎之。制辭爲禮科金堡筆。堡與丁時魁蒙正發劉湘南等立朝侃侃正綱紀，慎名器，素不爲近倖所喜。堡尤著

清直聲，見重於時。

九月拜密陳事宜疏。獻忠旣死，其義兒孫可望自蜀入滇，入黔，自稱東平王。旣而苦無以制其下，願聽撫求王爵。粵帥陳邦傳前聞高李諸將將入粵，慮不相容，欲結可望以自固，乃遣胡執恭、居滇，不敢歸。秦王廷臣知事出邦傳交章參劾，執恭居滇不敢歸。可望必欲求實封，廷議難之。會朝廷遣使勞軍，密以問公。公卽疏曰：可望久據成都，滇黔復爲所有，曷能禁其不自王？然必請命於上者，意尙知有朝廷也。我

不能禁其不自王而必欲靳之使不王勢必僨決今
誠降敕封之使恩出朝廷既可以徐收其用且令縛
胡執恭至正其罪而誅之則賞罰之權亦不倒置矣
疏上輔臣嚴起恒尙書吳貞毓侍郎楊鼎和給事中
劉克珍吳霖金堡張載述等持不可公再疏曰廷臣
謂異姓封王非祖制持議良正然不可以爲今日言
也可望已自稱王其黨李定國艾能奇劉文秀三人
亦皆稱王設但封以公爵必非所願萬一不受封因
而爲逆謂皇上威靈何謂天下事勢何或者又謂欲
收其用而先失國體適啟邪心非策之善則臣竊有
說於此謹按開國功臣六王皆追封也而尙書洛誥
日記宗功以功作元祀蓋古人臣有大功者常以元
祀慰勵之今或量封可望爲二字王卽於敕書中詳
載舊制明示破格相待之意而勉之以中山開平之
功則可望旣感激用命於祖制亦不爲背謬矣疏奏
朝廷命鑄印封可望爲平遼王

十月師次潯州

遘疾 公督師六年屢與大敵角勞悴萬狀值馬吉

翔李元允用事凡有奏請動見掣肘諸營多觀望不
進展布益難遂發憤成疾吐血不止

十一月公薨疾亟強起啟冠帶望闕再拜書遺疏
上之略曰臣自拜命以來任大責重竊不自量擬再
合餘燼少收桑榆不料調兵則一營不發若日堵督
臣而有兵是豐其羽翼也索餉則一毫不與若日堵
督臣而有餉是資其號令也致臣如空山獨夫坐視
疆場孔急號血拊心略無展布昨上西山橫邑感厲
太重一病不起遂快羣腹臣亦何恨但以萬死不死

之身不能爲皇上死於疆場而死於枕席實有餘恨
也臣死之後伏願皇上揀任老成用圖恢復若軍國
重事惟以馬吉翔李元允等數人爲股肱腹心事之
成敗尙屬可慮拜疏訖又南向拜父母曰兒死不獲
更還邱隴矣諸將環集公一一執手依依勉以忠義
爲決別語諸將灑淚拜伏牀下哀不自勝旣復呼筆
自題其像曰有明堵子生而精敏遭家不造誠身事
親遭時多難致身事君四十九年孤兒逋臣而今而
後浩然蒼旻未幾卒十一月二十六日丑時也卒之

夜侍疾者近百人寤寐間皆恍惚見二青衣牽牛而至公起迎笑脫幘易箬笠短衣至軒遂執遂跨牛騰空冉冉而去嗚呼公生以辛丑捷以丁丑卒以己丑丑之生屬固牛也茅峰之禱感於前潯陽之夢徵於後其生其卒抑豈偶然者哉

閏十一月葬于潯州之西山 朝廷聞公卒泣涕減膳輟朝五日贈公上柱國太傅太子太師中極殿大學士鎮國公諡文襄改諡忠肅蔭一子錦衣衛指揮同知世襲御祭九壇遣禮部官致祭賜塋潯州之西山以閏十一月十九日葬子世明祔後數年恭陵門人尹惟日爲廣東和平令發柩將送歸宜興未幾惟日物故公從子景濂跋涉千里入楚得公之柩於黃海縣之騎龍菴菴僧厯言屢年神靈赫奕諸事蹟相與嗟歎者久之挈歸葬於虞山之祖隴

毛廓菴曰己丑九月公納浙江紹興府之葉氏公卒時有三月孕囑部將常萬善善視之後竟負託及孫可望至粵迎駕執萬善數之日堵制臺真天神以嗣續見託而庸奴乃敢泄泄爲此態命鞭之至百萬善

哀泣求釋不聽其子因得不死今居滇中或者天道不爽日以繁而昌云

世明妻徐氏正明生母錢氏妻沈氏苦節終身與夫人陳氏相悲復相慰也後俱以壽終

歐陽典楚人爲公親吏五年在潯州送終有粵西實錄一卷專述公之事蹟其卷末自敘云典感知遇之恩結廬墓下思服心喪因時播遷未終所願云

跋

右堵文忠公年譜一卷邑人張夏編次夏之言曰公自著年史止於甲申二月其後則邑人任源祥所續而夏合之并增注焉然其書未付梓各家競相傳錄浸以失真或詳或畧兼多豕魚之誤惟予從姪玉山州倅所手鈔繁簡得宜讐校精審最爲善本今年哲嗣卓齋明經建屋三楹爲公特祠并取年史鈔之本以公同好以傳久遠而公之一生出處立身許國之大節卽此可以概見云

道光二十三年癸卯八月邑後學潘光序恭跋

新建堵文忠公祠碑記

吾邑山水清淑代產偉人若晉周孝侯明盧忠肅堵
文忠皆間世特出足以震古鑠今永垂不朽者也孝
侯廟食千古忠肅公亦

特旨予祠春秋秩祀惟文忠公祠廟缺如豈以公釋褐初
隸籍梁溪禋祀於彼從隆而於此從略歟抑思公世
居前亭釣遊之所年譜歷歷其客梁溪者暫爾夫公
之忠義奮發方駕文山實足爲溪山生色顧無一椽
之奉一甌之奠雖公之靈爽未必怨恫而仰止景行

者何從矜式哉古英賢杖履所至其風流餘韻卽僑
寓猶侈爲光寵況生長地乎朱子之婺源建安岳忠
武之湯陰西泠兩地皆有專廟是其例也明季王忠
烈公邑前輩奉祀於西郊陶泉俞公令荆邑時改建
今地祠西尙有基數十弓循覽形勢可建公祠公固
與忠烈爲鄉會同年寓祀於祠王公亦必怡然愜於
懷也超因勉力庀材營造閱兩月告成卽顏其門曰
懷堵仿金闔白公祠之仰蘇懷杜意也仲戊請官致
祭循以爲例今而後吉蠲庶享神來宴娛必有與忠
烈公相視莫逆者邑之人入廟瞻謁肅然有以興起
頑廉懦立其在斯乎

道光二十三年歲次癸卯仲夏邑後學潘士超謹撰

靜日軒跋

謹按文忠公年譜自幼而壯自家而國未有一日愉
快者惟崇禎己卯授南戶部主事蒞任後隨班書卯
外卽於署中燕處軒飲酒賦詩以自娛軒內楹帖有
聞二兌謝公所題環堵清齋閒度日當窗古栢欲參
天之句公輒然曰何巧合也先賢畱句待我矣但署
日雖閒豈宜虛度因改爲環堵蕭齋宜靜日少加理
葺移榻其中公餘展編獨坐覺有遠致調去猶時時
迴憶之今建屋三楹設公神位卽取靜日二字爲軒

跋

之額聊以妥公之靈慰公之願云爾士超謹識

亥



